

## CONVENIO DE COLABORACIÓN ENTRE A CONSELLERÍA DE SANIDADE E A ASOCIACIÓN "PLAN COMUNITARIO DE TEIS", PARA A EXECUCIÓN E DESENVOLVEMENTO DUN PLAN COMUNITARIO DE SAÚDE

### MEMORIA XUSTIFICATIVA

A secretaria xeral técnica, DECLARA:

Que a Consellería de Sanidade formalizou o día 6 de agosto de 2025, coa Asociación "Plan Comunitario do Teis" o instrumento convencional arriba referido. O convenio estará vixente desde o día seguinte ao da súa sinatura ata o 30 de xuño de 2028, podendo ser prorrogado por mutuo acordo das partes asinantes, formalizado por escrito, antes da data da súa finalización, sen que en ningún momento o período total de vixencia poda superar o límite de oito anos establecido no artigo 49 da Lei 40/2015, do 1 de outubro.

Que o instrumento convencional ten por obxecto:

Establecer as condicións de colaboración entre a Consellería de Sanidade e a Asociación "Plan Comunitario do Teis" para a execución e desenvolvemento dun Plan Comunitario de Saúde no barrio de Teis, conforme ás condicións descritas no seu anexo I.

Que existe converxencia de intereses entre as entidades asinantes en orden á consecución do obxectivo referido.

Que o instrumento convencional que se asinou se fundamenta no seguinte:

A Consellería de Sanidade ten entre as súas competencias a promoción da saúde pública, a prevención dos trastornos adictivos e a coordinación de políticas transversais que melloren os determinantes sociais, ambientais, educativos e comunitarios que afectan á saúde da poboación.

O Decreto 144/2024, do 20 de maio, polo que se establece a estrutura orgánica da Consellería de Sanidade, determina que esta é o órgano da Administración autonómica responsable da superior dirección e control da execución da política da Xunta en materia de saúde, planificación e asistencia sanitaria e farmacéutica, así como do exercicio das competencias da Xunta para asegurar á cidadanía o dereito á protección da saúde, de acordo co establecido nos artigos 27.23º, 28.8º e 33 do Estatuto de autonomía de Galicia e que lle foron asignadas polo Decreto 28/1980, do 15 de outubro.

A Asociación Plan Comunitario de Teis (en adiante a Asociación) é unha entidade con ampla experiencia e implantación no territorio, centrada en dinamizar procesos comunitarios de promoción da saúde e mellora da calidade de vida da cidadanía.

O barrio de Teis, polas súas características urbanísticas, sociais, económicas e ambientais é un barrio de especial vulnerabilidade no que concorren, actualmente as seguintes situacións: unha alta

concentración e persistencia de problemas económicos, como grandes carencias formativas, altos índices de absentismo escolar, alta taxa de desemprego, elevados casos de adiccións, significativa porcentaxe de persoas beneficiarias de axudas sociais, escasa ou nula participación social ou taxa de actividade económica, entre outros. Por outra parte, obsérvase un proceso de regresión urbanística, caracterizado pola degradación progresiva da edificación ou a persistencia de déficits de equipamentos, ou ben a insuficiencia ou a falta de calidade da urbanización, das redes viarias, de saneamento, do espazo público e as zonas verdes. Tamén é destacable a existencia de problemas relacionados coa seguridade e a convivencia, como unha alta concentración de delitos e actividades ilegais, inexistencia de estruturas de convivencia veciñal, relacións convivenciais conflitivas, así como importantes taxas de inseguridade cidadá.

Ambas partes consideran imprescindible afrontar os trastornos do comportamento –como as adiccións con e sen substancia– desde unha perspectiva integral, que atenda conxuntamente os diferentes determinantes da saúde, segundo os principios da saúde comunitaria e da equidade.

O enfoque proposto pola Asociación constitúe unha proposta singular e innovadora baseada nun modelo de intervención 360°, que implica de forma articulada á sociedade civil organizada, á administración sanitaria, á administración educativa e ao conxunto de axentes do territorio.

O carácter estratéxico e transversal deste proxecto sitúa a intervención como unha potencial boa práctica en promoción da saúde e prevención das adiccións, susceptible de ser avaliada e recoñecida polo Plan Nacional sobre Drogas.

A Asociación pertence á Área Sanitaria de Vigo que consta como 1ª na Táboa de priorización segundo o Índice de Risco Epidemiolóxico (IRE), polo que se considera a de maior índice de Risco en consumo de drogas, cunha cualificación de 12 puntos de Índice de Risco Absoluto de Prioridade. Ademais, é o único Plan Comunitario existente na Provincia de Pontevedra.

Tendo en conta as especiais condicións do plan como da zona na que se desenvolve, así como a especialización técnica da Asociación, a súa implantación local e a metodoloxía específica que a distingue doutras iniciativas, non resulta posible promover a concorrencia.

Dadas as razóns de interese público expostas, de acordo co previsto nos artigos 19.4.c) e 26.2.a) da Lei 9/2007, do 13 de xuño, de subvencións de Galicia e o artigo 40 do Decreto 11/2009, do 8 de xaneiro, polo que se aproba o seu regulamento, nos que se regula a posibilidade de conceder subvencións de forma directa sempre que se acrediten razóns de interese público, social, económico ou humanitario ou outras debidamente xustificadas que dificulten a súa convocatoria pública, as partes coinciden na necesidade de establecer un marco de colaboración para desenvolver esta acción comunitaria de saúde no ámbito territorial definido.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público pola que se traspoñen ao ordenamento xurídico



español as Directivas do Parlamento Europeo e do Consello 2014/23/UE e 2014/24/UE, do 26 de abril de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estimouse xustificado o recurso á sinatura do instrumento convencional, con exclusión doutras figuras.

E para que conste, asínase esta memoria, en Santiago de Compostela

